

摘藻堂四庫全書薈要

史部

欽定四庫全書薈要

史部

直齋書錄解題卷

九至
十一

臣
沈初詳校

詳校官員外郎臣潘紹觀



欽定四庫全書薈要卷九千七百十五

史部

直齋書錄解題卷九

宋 陳振孫 撰

儒家類

家語十卷

孔子二十二世孫猛所傳魏散騎常侍王肅為之注

肅闢鄭學猛嘗受學於肅肅從猛得此書與肅所論多合從而證之遂行於世云博士安國所得壁中書也亦未必然其間所載多已見左氏傳大戴禮諸書

云肅東海人父朗

曾子二卷

案唐書藝文志及文獻通攷俱作二卷原本作十卷誤今改正

凡十篇具大戴禮後人從其中錄出別行慈谿楊簡

注

晏子春秋十二卷

齊大夫平仲晏嬰撰漢志八篇但曰晏子隋唐七卷

始號晏子春秋今卷數不同未知果本書名

案崇文總目謂

其書已亡世所傳者蓋後人采嬰行事而成故柳宗元謂墨氏之徒有齊人者為之非嬰所自著也

荀子二十卷

楚蘭陵令趙國荀况撰漢志作孫卿子云齊稷下祭酒其曰孫者避宣帝諱也至楊倞始改為荀卿

荀子注二十卷

唐大理評事楊倞注案劉向序校中書三百二十二篇以校除複重二百九十篇定著三十二篇隋志為十二卷至倞始分為二十卷而注釋之淳熙中錢佃耕道用元豐監本參校刊之江西漕司其同異著之

篇末凡二百二十六條視他本最為完善

賈子十一卷

案崇文總目云隋唐志皆九卷新唐書藝文志作十卷此本作十一卷疑誤

漢長沙王太傅洛陽賈誼撰漢志五十八篇今書首載過秦論末為弔湘賦餘皆錄漢書語且略節誼本傳於第十一卷中其非漢書所有者輒淺駁不足觀決非誼本書也

鹽鐵論十卷

漢廬江太守丞汝南桓寬次公撰本始元年召問賢

良文學對願罷鹽鐵榷酤均輸與御史大夫宏羊相詰難於是止罷榷酤而鹽鐵卒不變故昭紀贊曰議鹽鐵而罷榷酤也及宣帝時寬推行增廣著數萬言凡六十篇其末曰雜論班書取以為論贊其言桑大夫據當世合時變上權利之畧雖非正法鉅儒宿學不能自解博物通達之士也嗚呼世之小人何嘗無才以熙寧日錄言之王安石之辯雖曰儒者其實桑大夫之流也霍光號知時務與民更始而鹽鐵之議

乃俾先朝首事之臣與諸儒議論反覆不厭或是或非一切付之公論而或行或否未嘗容心焉以不學無術之人而暗合乎孟莊子父臣父政之義曾謂元祐諸賢而慮不及此乎

新序十卷

漢護都水使者光祿大夫劉向子政撰舜禹以來迄于周嘉言善行徃徃在焉其書最為近古

案曾鞏序畧曰向之

序此書於今最為近古雖不能無失然遠至舜禹而次及於周秦以來古人之嘉言善行亦徃徃而有也

此云自舜禹以來
迄於周疑有脫句

說苑二十卷

劉向撰序言臣向所校中書說苑雜事除去與新序
複重者其餘淺薄不中義理別集以為百家後今以
類相從更以造新事凡二十篇七百八十四章號曰
說苑案漢志劉向所序六十七篇謂新序說苑世說
列女傳頌圖也今本南豐曾鞏序言崇文總目存者
五篇從士大夫得十五篇與舊為二十篇未知即當

時篇章否新苑之名亦不同

法言十卷

案唐書藝文志作六卷

漢黃門郎蜀揚雄子雲撰凡十三篇篇各有序本在卷末如班固叙傳然今本分冠篇首自宋咸始也

法言注十三卷音義一卷

晉尚書郎李軌宏範注此本歷景祐嘉祐治平三降詔更監學館閣兩制校定然後頒行與建寧四注本不同錢佃得舊監本刻之與孟荀文中子為四書

太元經十卷

揚雄撰五業主事章陵宋衷仲子解詁吳鬱林太守
陸績公紀釋文晉尚書郎范望叔明解贊案漢志揚
雄所叙三十八篇太元十九本傳三方九州二十七
部八十一家七百二十九贊分為三卷有首衝錯測
攤瑩數文捫圖告十一篇皆以解剝元體蓋與本經
三卷共為十四今志云十九未詳初宋陸二家各依
舊本解釋范望折中長短或加新意既成此注乃以

元首一篇加經贊之上元測一篇附贊之下為九篇
列為四卷首測一序仍載之第一卷之首蓋猶王弼
離合古易之類也卷首有陸績述元一篇

本傳尚有二百四十三表六字

隨齋
批注

說元一篇

唐宰相河南王涯廣津撰明宗立例撰法占法辨首
凡五篇

太元釋文一卷

相傳自侯芭虞翻宋衷陸績互相增損非後人所作也吳秘嘗作音義豈即此耶

太元集注六卷

司馬光撰自宋衷而下四家之外有直昭文館宋惟幹注天水尉陳漸演元司封郎吳秘音義通前凡七家集取其說斷以己意

元解四卷元歷一卷

右丞襄陵許翰崧老撰所解十一篇通溫公注為十

卷倣韓康伯注繫辭合王弼為全書之例也大抵元

首如彖贊如爻

案原本脫彖贊如三字
今據文獻通攷補入

測如象文如

文言攤瑩祝告如繫辭數如說卦衝如序卦錯如雜
卦之類其於易也規規然擬之勤矣太元歷者亦翰
所傳云溫公手錄不著何人作

申鑒五卷

漢黃門侍郎潁川荀悅仲豫撰獻帝頗好文學政在
曹氏恭己而已悅志在獻替而謀無所用乃作此書

五篇奏之其曰教化之廢推中人而墮於小人之域教化之行引中人而納於君子之塗古今名言也

本傳止載政體一篇有曰前鑒既明後復申之故名

隨齋
批注

中論二卷

漢五官將文學北海徐幹偉長撰唐志六卷今本二

十篇有序而無名氏蓋同時人所作

案貞觀政要太宗嘗稱見幹中

論復三年喪篇宋時館閣本已闕又魏志文帝稱幹著中論二十餘篇則知二十篇非全書也

孔叢子七卷

孔氏子孫雜記其先世系言行之書也小爾雅一篇亦出於此中興書目稱漢孔鮒撰一名盤孟案孔光傳夫子八世孫鮒魏相順之子為陳涉博士死陳下則固不得為漢人而其書紀鮒之沒第七卷號連叢子者又記太常臧而下數世迄於延光三年季彥之卒則又安得以為鮒撰案儒林傳所載為博士者又曰孔甲顏注曰將名鮒而字甲也今攷此書稱子魚

名鮒陳人或謂之子鮒或稱孔甲然則顏監未嘗見
此書耶藝文志有孔甲盤孟二十六篇本注謂黃帝
史或曰夏帝孔甲似皆非也其書蓋田蚡所學者與
孔鮒初不相涉也中興書目乃曰一名盤孟不知何
據豈以漢志所謂孔甲即陳王博士之孔甲耶

帝範一卷

案舊唐書經籍志作四
卷宋史藝文志作二卷

唐太宗撰凡十二篇以賜高宗

中說十卷

隋河汾王通仲淹撰唐志五卷今本第十卷有文中

子世家房魏論禮樂事書關子明事及王氏家書雜

錄舊傳以此為前後序非也

案晁公武讀書志是書係王通之門人共集其

師之語

中說注十卷

太常丞阮逸天隱撰

中說注十卷

正議大夫淄川龔鼎臣輔之撰自甲至癸為十卷而

所謂前後序者在十卷之外亦頗有所刪取李格非跋云龔自謂明道間得唐本於齊州李冠比阮本改正二百餘處

潛虛一卷

司馬光撰言萬物皆祖於虛元以準易虛以準元

潛虛發微論一卷

監察御史張敦實撰凡九篇

周子通書一卷太極圖說一卷

廣東提刑春陵周敦頤茂叔撰

周子通書遺文遺事一卷

侍講朱熹集次刊於南康

帝學八卷

案文獻通攷作十卷

侍講成都范祖禹淳父元祐中編集上自三皇五帝迄於本朝神宗凡聖學事實皆具焉

正蒙書十卷

崇文校書長安張載子厚撰凡十九篇

案晁公武讀書志是書初

無篇次其後門人蘇
昞等區別成十七篇

范育呂大臨蘇昞為前後序皆

其門人也又有待制胡安國所傳編為一卷末有行
狀一卷

經學理窟一卷

張載撰

西銘集解一卷

張載作訂頑砭愚二銘後更曰東西銘其西銘即訂
頑也大抵發明理一分殊之旨有趙師俠者集呂大

臨胡安國張九成朱熹四家之說為一編刻之興化軍

通書西銘集解三卷

戶部侍郎新昌王夢龍慶翔所集

河南師說十卷

尚書潁川韓元吉无咎以河南雅言伊川雜說及諸家語錄釐為十卷以尹和靖所編為卷首不若遺書之詳訂也

山東野錄七卷

殿中丞臨淄賈同公疎撰本名罔真宗御筆改之蓋祥符祀汾陰時所放經明行修進士也

程氏遺書二十五卷附錄一卷外書十三卷

朱熹集錄二程門人李籲端伯而下諸家所聞見問答之語附錄行狀哀詞祭文之屬八篇其年譜朱公所撰述也外書則又二十五篇之所遺者

皇極經世書十二卷

邵雍堯夫撰其學出於李之才挺之之才受之穆脩
伯長脩受之种放明逸放受之陳搏蓋數學也曰元
會運世以元經會以運經世自帝堯至於五代天下
離合治亂興廢得失邪正之迹以天時而驗人事以
陰陽剛柔窮聲音律呂以窮萬物之數末二卷論所
以為書之意窮日月星辰飛走動植之數以盡天地
萬物之理述皇王帝霸之事以明大中至正之道書
謂之皇極經世篇謂之觀物凡六十二篇其子伯溫

為之叙系具載先天後天變卦反對諸圖又為易學
辨惑一篇叙傳授本末真偽然世之能明其學者蓋
鮮焉

觀物外篇六卷

康節門人太常寺簿張嵴子望記其言雖十纔一二
而足以發明成書

觀物內篇二卷

康節之子右奉直大夫伯溫撰即經世書之第十一

十二卷也張氏曰先生觀物有內外篇內篇先生所著之書也外篇門人所記先生之言也內篇理深而數略外篇數詳而理顯學先天者當自外篇始先生詩云若無揚子天人學安有莊周內外篇以此知外篇亦先生之文門人蓋編集之耳又曰皇極經世者康節之易先天之嗣也觀物篇立言廣大措意精微如繫辭然稽之以理既無不通參之以數亦無不合

案以上三書皆已見易類而解題詳畧互異今並仍之

近思錄十四卷

朱熹呂祖謙取周程之書關於大體而切於日用者
六百十九條取切問近思之義以教後學

元城語錄三卷

右朝散郎維揚馬永卿大年撰永卿初仕亳州永城
主簿從寓公劉安世器之學記其所聞之語

劉先生談錄一卷

知秀州韓瓘德全撰瓘億之曾孫緬之孫官二浙道

睢陽往來必見劉元城記其所談二十一則

道護錄一卷

胡珵德輝所錄劉元城語凡十九則以上三書皆刻章貢末又有邵伯溫呂本中所記數事附焉

庭闈豪錄一卷

即楊迴所錄當政和八年其父亡恙時也

龜山別錄二卷

不知何人所錄

龜山語錄五卷

延平陳淵幾叟羅從彥仲素建安胡大原伯逢所錄
楊時中立語及其子迥豪錄共四卷末卷為附錄墓
誌遺事順昌廖德明子晦所集也

尹和靖語錄四卷

馮忠恕祈寬居之呂堅中崇實所錄尹焞彥明語

胡氏傳家錄五卷

曾幾吉父徐時動舜鄰楊訓子中所記胡安國康侯

問答之語及其子寧和仲所錄家庭之訓

無垢語錄十四卷言行編遺文共一卷

張九成子韶之甥于恕所編心傳錄及其門人郎昱所記日新錄近時徐鹿卿德夫教授南安復裒其言行繫以歲月及遺文三十篇附於末

南軒語錄十二卷

蔣邁所記張拭敬夫語

晞顏錄一卷

張拭取經傳中凡言及顏子者錄為一編

晦庵語錄四十六卷

著作佐郎陵陽李道傳貫之哀晦翁門人廖德明子
晦而下三十二家刻之九江

晦庵續錄四十六卷

李太史之弟樞密性傳成之又得黃幹直卿而下四
十一家及前錄所無者併刻之合貫之前錄益見該
備矣

節孝先生語一卷

江端禮李恭所錄山陽徐積仲車語

童蒙訓一卷

中書舍人東萊呂本中居仁撰

師友雜志一卷雜說一卷

呂本中撰

胡子知言一卷

五峰胡宏仁仲撰文定公安國之季子張南軒從之

遊

忘筌書二卷

浦城潘植子醇撰多言易亦涉異端凡五十一篇此書載鳴道集為九十二篇附見者又十有三而館閣書目又稱七十七篇皆未詳

諸儒鳴道集七十二卷

不知何人所集涑水濂溪明道伊川橫渠元城上蔡無垢以及江民表劉子翬潘子醇凡十一家其去取

不可曉

兼山遺學六卷

河南郭雍錄其父忠孝之遺書前二卷為易著卦次為九圖又次說春秋又次為性說三篇末卷問答雜說忠孝父子世系出處本末詳見易類

玉泉講學一卷

沙隨程迥可久所記喻樗子才語樗本末見語孟類周簡惠聖傳錄一卷

參政荆溪周葵惇義撰

案周惇義名葵原
本誤作蔡今改正

自堯舜至

孔孟聖傳正統為絕句詩二十章而各著其說自為
一家然無高論

小學書四卷

朱熹所集古聖格言至論以教學者皆成童幼志進
學之序也內篇曰立教明倫敬身稽古外篇曰嘉言
善行

呂氏讀書記七卷

呂祖謙撰乾道癸巳淳熙乙未家居日閱之書隨意
手筆或數字或全篇蓋偶有所感發或以備遺忘者
閻範十卷

呂祖謙撰集經史子傳發明人倫之道見於父子兄
弟之間者為一篇時教授嚴州張南軒守郡寔為之
序

少儀外傳二卷

呂祖謙撰雜取經傳嘉言善行切於立身應世者皆

博學切問之事也而大要以謹厚為本

尊孟辨七卷

建安余允文隱之撰以司馬公有疑孟及李邁泰伯
常語鄭厚叔友折衷皆有非孟之言故辨之為五卷
後二卷則王充論衡刺孟及東坡論語說中與孟子
異者亦辨焉

先聖大訓六卷

龍圖閣學士慈谿楊簡敬仲撰

案楊簡官龍圖閣學士此本脫龍圖二字

今補取禮記家語左傳國語而下諸書凡稱孔子之正

言皆類為此編然聖人之言旨意未易識也喪欲速貧死欲速朽自門弟子已不能知其有為而言況於百氏所記其間淺陋依托可勝道哉多聞闕疑庶乎其弗畔也

已易一卷

楊簡撰

慈湖遺書三卷

揚簡撰前二卷雜說末一卷遺文慈湖之學專主乎
心之精神是謂聖一語其誨人惟欲發明本心而有
所覺然其稱學者之覺亦頗輕於印可蓋其用功偏
於上達受人之欺而不疑竊嘗謂誠明一理焉有誠
而不明者乎當淳熙中象山陸九淵之學盛行於江
西朱侍講不然之朱公於前輩不肯張無垢於同流
不肯陸象山為其本原未純故也象山之後一傳而
慈湖遂如此甚矣道之不明賢知者過之也

明倫集十卷

高安塗近止撰取經傳言行之要以孝為本推而廣之為十篇塗有子登科得初品官致仕

心經法語一卷

參政建安真德秀希元撰集聖賢論心格言

三先生謚議一卷

嘉定中魏了翁華父為潼川憲奏請賜周程謚寶慶守李大謙集而刻之併及諸郡祠堂記文

言子三卷

言偃吳人相傳所居在常熟縣慶元間邑宰孫應時
季和始為立祠求朱晦翁為記近新昌王爚伯晦復
裒論語諸書所載問答為此書邑中至今有言氏亦
買田教養之

道家類

老子道德經二卷

周柱下史李耳伯陽撰昔人言謚曰聃故世稱老聃

然明之為訓耳漫無輪也似不得為諡

御注老子二卷

徽宗皇帝御製

老子注二卷

魏王弼撰魏晉之世元學盛行弼之談元冠於流輩
故其注易亦多元義晁說之以道曰弼本深於老子
而易則未也其於易多假諸老子之旨而老子無資
於易其有餘不足之迹可見矣世所行老子分道德

經為上下卷此本道德經且無章目當是古本

老子道德論述要二卷

司馬光撰太史公曰老子著書言道德之意後人以
其篇首之文名上篇曰道下篇曰德夫道德連體不
可偏舉合從本名溫公之說如此其不曰經而曰論
亦公新意也

老子新解二卷

蘇轍撰東坡跋曰使戰國有此書則無商鞅韓非使

漢初有此書則孔老為一使晉宋間有此書則佛老
不為二

老子解二卷

葉夢得撰其說曰孔子稱竊比於我老彭孟子闢楊
墨而不及老氏老氏之書孔孟所不廢也所解生之
徒十有三死之徒十有三

案老子解云生之徒十有三死之徒十有三原本作

死之徒有三誤今改正

以為四肢九竅本韓非子解老之說

易老通言十卷

程大昌撰其序言名為訓老而實該六經故曰易老
通言易在而六經皆在矣蓋以易為六經之首也

列子八卷

鄭人列禦寇撰穆公時人

案劉向校定八篇謂列禦寇與鄭繆公同時抑宗元

云鄭繆公在孔子前幾百載禦寇書言鄭殺其相驪
子陽則鄭繆公二十四年當魯穆公之十年向蓋因

魯穆公而

誤為鄭耳

列子注八卷

晉光祿勳張湛處度撰

列子釋文二卷

唐當塗縣丞殷敬順撰

案殷敬順撰列子釋文原本作處順今改正

莊子十卷

蒙漆園吏宋人莊周撰案史記與齊宣梁惠同時則亦當與孟子相先後矣

莊子注十卷

晉太傅主簿河南郭象子元撰案本傳向秀解義未竟而卒頗有別本遷流象竊以為已注乃自注秋水

至樂二篇又易馬蹄一篇其餘點定文句而已其後
秀義別出故今有向郭二莊其義一也然向義今不
傳但時見陸氏釋文

莊子音義三卷

唐陸德明撰即經典釋文二十六至二十八卷

莊子疏三十卷

唐道士西華法師陝郡成元英子實撰元英隱東海
貞觀五年召至京師永徽中流郁州不知坐何事唐

藝文志云

鬻子一卷

鬻熊為周文王師封於楚為始祖漢志云爾書凡十二篇今書十五篇陸佃農師所校

鬻子注一卷

唐鄭縣尉逢行珪撰止十四篇蓋中間以二章合而為一故視陸本又少一篇此書甲乙篇次皆不可曉二本前後亦不同姑兩存之

關尹子九卷

周關令尹喜蓋與老子同時啓老子著書言道德者
案漢志有關尹子九篇而隋唐及國史志皆不著錄
意其書亡久矣徐藏子禮得之於永嘉孫定首載劉
向校定序篇末有葛洪後序未知孫定從何傳授殆
皆依托也序亦不類向文

亢倉子三卷

案唐書藝文志文
獻通攷俱作二卷

何晏注首篇所載與莊子庚桑楚同亢倉者庚桑聲

之變也其餘篇亦皆依托唐柳子厚辨其非劉向班固所錄是矣今唐志有王士元亢倉子二卷注云天寶元年詔號莊子為南華真經列子沖虛文子通元亢倉子洞靈真經然亢倉子求之不獲襄陽處士王士元謂莊子作庚桑子太史公列子作亢倉子其實一也乃取諸子文義類者補其亡然則今之亢倉子元為之也宗元唐人豈偶不之知耶

文子十二卷

題默希子注案漢志有文子九篇老子弟子與孔子同時而稱周平王問似依托者也又案史記貨殖傳徐廣注計然范蠡師名鉏裴駰曰計然葵丘濮上人姓辛氏字文子默希子引以為據然自班固時已疑其依托况又未必當時本書乎至以文子為計然之字尤不可攷信抑子厚亦辨其為駁書而亦頗有取焉默希子不著名氏晁公武曰唐徐靈府自號也

鵑冠子三卷

陸佃解案漢志鵩冠子楚人居深山以鵩為冠今書
十九篇韓吏部稱十有六篇故陸謂非其全也韓公
頗道其書至柳柳州則曰盡鄙淺言也好事者偽為
其書反用鵬賦以文飾之其好惡不同如此自今攷
之柳說為長

抱朴子二十卷

晉句漏令丹陽葛洪稚川撰洪所著書內篇言神仙
黃白變化之事外篇駁難通釋此二十卷者內篇也

館閣書目有外篇五十卷

坐忘論一卷

唐逸人河內司馬承禎子微撰言坐忘安心之法凡
七條并樞翼一篇以為修道階次其論與釋氏相出
入

天隱子一卷

司馬子微作序言不知其何許人著書八篇修鍊形
氣養和心靈長生久視無出此書今觀其言殆與坐

忘論相表裏豈天隱云者托之別號歟

案洪興祖云司馬子微得

天隱子之學未知何據

元真子外篇三卷

唐隱士金華張志和撰唐志元真子十二卷今纔三卷非全書也既曰外篇則必有內篇矣志和事迹詳見余所集碑傳

無能子三卷

不著名氏唐志云光啓中隱民間蓋其自序云爾

莊子義十卷

參政清源呂惠卿吉父撰元豐七年先表進內篇其餘蓋續成之

莊子十論一卷

題李士表撰未詳何人

直齋書錄解題卷九

欽定四庫全書薈要卷九千七百十六

史部

直齋書錄解題卷十

宋 陳振孫 撰

法家類

管子二十四卷

案隋唐經籍志
俱作十九卷

齊相管夷吾撰唐房元齡注案漢志管子八十六篇
列於道家隋唐志著之法家之首今篇數與漢志合
而卷視隋唐為多管子似非法家而世皆稱管商豈
以其操術用心之同故耶然以為道則不類今從隋

唐志

商子五卷

秦相衛公孫鞅撰或稱商君者其封邑也漢志二十九篇今二十六篇又亡其一

慎子一卷

趙人慎到撰漢志四十二篇先於申韓稱之唐志十卷滕輔注今麻沙刻本纔五篇固非全書也案莊周荀卿書皆稱田駢慎到到趙人駢齊人見於史記列

傳今中興館閣書目乃曰瀏陽人瀏陽在今潭州吳時始置縣與趙南北了不相涉蓋据書坊所稱不知何謂也崇文總目言三十七篇

韓子二十卷

韓諸公子韓非撰漢志五十五篇今同所謂孤憤說難之屬皆在焉

名家類

公孫龍子三卷

趙人公孫龍為白馬非馬堅白之辨者也其為說淺

陋迂僻不知何以惑當時之聽漢志十四篇

案漢書藝文志

六十四篇此云十四篇誤

今書六篇首叙孔穿事文意重複

鄧析子二卷

鄭人鄧析左氏傳鄭駟歆嗣子太叔為政殺鄧析而用其竹刑即此人也列子荀子以為子產所殺顏師古辨之矣

尹文子三卷

案宋史藝文志作一卷文獻通攷作二卷

齊人尹文撰漢志齊宣王時人先公孫龍今本稱仲
長氏撰定魏黃初未得於繆熙伯又言與宋鉞田駢
同學於公孫龍則不然也龍書稱尹文乃借文對齊
宣王語以難孔穿其人當在龍先班志言之是矣仲
長氏即統也耶熙伯名襲

人物志三卷

案劉劭人物志止上中下三
卷原本作二十卷誤今改正

魏散騎常侍邯鄲劉劭孔才撰梁儒林祭酒燉煌劉
昺注梁史無劉昺中興書目云爾晁氏云偽涼人

廣人物志十卷

案唐書藝文志作三卷
宋史藝文志作二卷

唐鄉貢進士京兆杜周士撰叙武德至貞元選舉薦
進人物事實凡五十五科

墨家類

墨子三卷

宋大夫墨翟撰孟子所謂邪說詖行與楊朱同科者
也韓吏部推尊孟氏而讀墨一章乃謂孔墨相為用
何哉漢志七十一篇館閣書目有十五卷六十一篇

者多訛脫不相聯屬又二本止存十三篇者當是此
本也方楊墨之盛獨一孟子訟言非之諄諄焉惟恐
不勝今楊朱書不傳列子僅存其餘墨氏書傳於世
者亦止於此孟子越百世益光明遂能上配孔氏與
論語並行異端之學安能抗吾道哉

從橫家類

鬼谷子三卷

案唐書藝文
志作二卷

戰國時蘇秦張儀所師事者號鬼谷先生其地在潁

川陽城名氏不傳於世此書漢志亦無有隋唐志始見之唐志則直以為蘇秦撰不可攷也隋志有皇甫謐樂壹二家注今本稱陶宏景注

案徐廣曰潁川陽城有鬼谷注其書

者樂壹皇甫謐

陶宏景尹知章

農家類

農家者流本於農稷之官勤耕桑以足衣食神農之言許行學之漢世野老之書不傳於後而唐志著錄雜以歲時月令及相牛馬諸書是猶

薄有關於農者至於錢譜相貝鷹鶴之屬於農
何與焉今既各從其類而花果栽植之事猶以
農圃一體附見於此其實則浮末之病本者也

齊民要術十卷

後魏高陽太守賈思勰撰起自耕農終於醢醢資生
之業靡不畢書凡九十三篇其曰治生之道不仕則
農蓋名言也

山居要術三卷

稱王旻撰館閣書目作王旻皆莫知何時人也

四時纂要五卷

案宋史藝文志作十卷

唐韓諤撰雖曰歲時之書然皆為農事也

蠶書二卷

案宋史藝文志作三卷

孫光憲撰光憲事跡見小說類

秦少游蠶書一卷

見少游淮海集第六卷序略曰予閒居婦善蠶從婦論蠶作蠶書考之禹貢揚梁幽雍不貢繭物充筐織

文徐篚元織縞荆篚元纁璣組豫篚織纁青篚縻絲
皆繭物也而桑土既蠶獨言於克然則九州蠶事克
為最乎予游濟河之間見蠶者豫事時作一婦不蠶
比屋詈之故知克人可為蠶師今予所書有與吳中
蠶家不同者皆得之克人也

案此條文獻通攷引陳氏之言原本脫今補入

禾譜五卷

宣德郎溫陵曾安止移忠撰東坡所為賦秧馬歌也
謂禾譜文既溫雅事亦詳實惜其不譜農器故以此

歌附之安止熙寧進士嘗為彭澤令右丞黃履安中誌其墓

農器譜三卷續二卷

耒陽令曾之謹撰安止之姪孫也追述東坡作歌之意為此編周益公為之序陸務觀亦作詩題其後

農書三卷

稱西山隱居全真子陳勇撰

案農書係陳勇撰原本誤作雱今改正

詳何人其書曰田曰牛曰蠶洪慶善為之後序

耕桑治生要備二卷

左宣教郎通判橫州何先覺撰紹興癸酉序

耕織圖一卷

於潛令鄞樓璠壽玉撰攻媿參政之伯父也

竹譜一卷

案宋史藝文志作三卷

武昌戴凱之慶預撰皆四字語

筍譜一卷

僧贊寧撰

案晁公武讀書志作僧惠崇撰

夢溪忘懷錄三卷

沈括存中撰自稱夢溪丈人括坐永樂事閒廢晚歲
乃以光祿卿分司卜居京口之夢溪有水竹山林之
適少有懷山錄可資居山之樂者輒記之自謂今可
忘于懷矣故名忘懷錄

越中牡丹花品二卷

僧仲休撰其序言越之所好尚惟牡丹其絕麗者三
十二種始乎郡齋豪家名族梵宇道宮池臺水榭植

之無間來賞花者不間親踈謂之看花局澤國此月
多有輕雲微雨謂之養花天里語曰彈琴種花陪酒
陪歌未稱丙戌歲八月十五日移花日序丙戌者當
是雍熙三年也越在國初繁富如此殆不減洛中今
民貧至骨種花之風遂絕何今昔之異耶其故有二
一者鏡湖為田歲多不登二者和買土著數倍常賦
勢不得不貧也

牡丹譜一卷

歐陽修撰少年為河南從事目擊洛花之盛遂為此譜蔡君謨書之盛行於世

冀王宮花品一卷

題景祐元年滄州觀察使記以五十種分為三等九品而潛溪緋平頭紫居正一品姚黃反居其次不可曉也

吳中花品一卷

慶歷乙酉趙郡李英述皆出洛陽花品之外者以今

日吳中論之雖曰植花未能如承平之盛也

花譜二卷

案宋史藝文志作一卷

榮陽張岫子堅撰以花有千葉多葉黃紅紫白之別類以為譜凡千葉五十八品多葉六十二品又以芍藥附其末岫與其弟嶠子望同登進士第嶠嘗從邵康節學

牡丹芍藥花品七卷

不著名氏錄歐公及仲休等諸家牡丹譜孔常甫芍

藥譜共為一編

芍藥譜一卷

中書舍人清江劉攽貢父撰

芍藥圖序一卷

待制新淦孔武仲常甫撰

案孔武仲新淦人原本誤作新淦今改正

芍藥譜一卷

知江都縣王觀通叟撰三家皆述維揚所產花之盛

荔枝譜一卷

端明殿學士莆田蔡襄君謨撰且書而刻之與牡丹
記並行閩無佳石以板刊歲久地又濕皆蠹朽至今
猶藏其家而字多不完可惜也

荔枝故事一卷

無名氏

案晁公武讀書
志亦作蔡襄撰

增城荔枝譜一卷

亦無名氏其序言福唐人熙寧九年承乏增城多植
荔枝蓋非嶠南之火山寔類吾鄉之晚熟搜境內所

出得百餘種其初亦得閩中佳種植之故為是譜

四時栽接花果圖一卷

無名氏

桐譜一卷

銅陵逸民陳翥撰皇祐元年序

何首烏傳一卷

初見唐李翱集今後人增廣之耳

海棠記一卷

吳人沈立撰

菊譜一卷

彭城劉蒙撰凡三十五品

菊譜一卷

史正志志道撰孝廟朝為發運使者也

范村梅菊譜二卷

范成大至能撰有園在居第之側號范村

橘錄三卷

知温州延安韓彥直子溫撰世忠長子也

糖霜譜一卷

遂寧王灼晦叔撰言四方所產遂寧為冠灼自號頤
堂

蟹譜二卷

稱怪山傅肱子翼撰嘉祐四年序怪山者越之飛來
山也

蟹略四卷

高似孫續古撰

雜家類

呂氏春秋二十六卷

案唐宋藝文志俱作二十六卷原本作三十六卷誤今改正

秦相呂不韋撰後漢高誘注其書有十二紀八覽六論十二紀者即今禮記之月令也

淮南鴻烈解二十一卷

漢淮南王安與賓客撰後漢太尉許慎叔重注案唐志又有高誘注今本既題許慎記上而詳序文則是

高誘不可曉也序言自誘之少從同縣盧君受其句
讀盧君者植也與之同縣則誘乃涿郡人又言是建
安十年辟司空掾東郡濮陽令十七年遷監河東則
誘乃漢末人其出處略可見

子華子十卷

稱晉人程本字子華與孔子同時考前世史志及諸
家書目並無此書蓋假託也館閣書目辨之當矣家
語有孔子遇程子傾蓋贈束帛之事而莊子亦載子

華子見昭僖侯一則此其姓字之所從出昭僖與孔子不同時也莊子固寓言而家語亦未可考信班固古今人表亦無之使果有其人遇合於夫子班固豈應見遺也其文不古然亦有可觀者當出於近世能言之流為此以玩世爾

論衡三十卷

漢上虞王充仲任撰肅宗時人仕為州從事治中初著書八十五篇釋物類同異正時俗嫌疑蔡邕王朗

初傳之時以為不見異人當得異書自今觀之亦未見其奇也

女誠一卷

漢曹世叔妻班昭撰固之妹也俗號女孝經

潛夫論十卷

漢安定王符節信撰

風俗通義十卷

漢泰山太守汝南應劭仲遠撰唐志二十卷今惟存

十卷餘略見庾仲容子鈔

蔣子萬機論二卷

魏太尉平河蔣濟子通撰案館閣書目卷五十五篇
今惟十五篇恐非全書也

博物志十卷

案此書別有注
本互見小說家

晉司空范陽張華茂先撰多奇聞異事華能辨龍鮓
識劍氣其學固然也

古今注三卷

晉太傅丞崔豹正熊撰

孫子十卷

題晉孫綽興公撰恐依託唐志及中興書目並無之
余從程文簡家借錄

劉子五卷

劉晝孔昭撰播州錄事叅軍袁孝政為序

案劉子序係袁孝政

作原本脫
姓今補入

凡五十五篇案唐志十卷劉勰撰今序云

晝傷已不遇天下陵遲播遷江表故作此書時人莫

知謂為劉勰或曰劉歆劉孝標作孝政之言云爾終不知畫為何代人其書近出傳記無稱莫詳其始末不知何以知其名畫而字孔昭也

金樓子十卷

梁元帝繹世誠為湘東王時所述也雜記古今聞見末一卷為自序

瑞應圖十卷

不著名氏案唐志有孫柔之瑞應圖記熊理瑞應圖

譜各三卷

案唐書藝文志作熊理瑞應圖讚三卷

顧野王符瑞圖十卷

又祥瑞圖十卷今此書名與孫熊同而卷數與顧合

意其野王書也其間亦多援孫氏以為注中興書目

有符瑞圖二卷定著為野王又有瑞應圖十卷稱不

知作者載天地瑞應諸物以類分門今書正爾未知

果野王否又云或題王昌齡至李淑書目又直以為

孫柔之其為昌齡或不可知而此書多引孫氏則決

非柔之矣又恐李氏書別一家也

子鈔三十卷

梁尚書左丞潁川庾仲容子仲撰所取諸子之書百有五家其間頗有與今世見行書不同者而亡者亦多矣

意林三卷

唐大理評事扶風馬總會元撰以庾鈔增損裁擇為此書總後宦達嘗副裴晉公平淮西者也

顏氏家訓七卷

北齊黃門侍郎琅邪顏之推撰古今家訓以此為祖
而其書崇尚釋氏故不列於儒家

匡謬正俗八卷

案前第二卷毛詩補音解題所引顏氏
糾謬正俗即此書因避諱匡字改作糾

唐祕書監琅邪顏籀師古撰其子符璽郎揚庭永徽
二年表上之

刊謬正俗跋八卷

莆田鄭樵撰

理道要訣十卷

唐宰相杜佑撰凡三十三篇皆設問答之辭末二卷
記古今異制蓋於通典中撮要以便人主觀覽

造化權輿六卷

唐豐王府法曹趙自勔撰天寶七年表上陸農師著
埤雅頗採用之其孫務觀嘗兩為之跋余求之久不
獲己亥歲從吳門天慶道藏中借錄

祝融子兩同書二卷

不著名氏中興書目云唐吳筠撰唐藝文志同但入

小說類又案崇文總目以為羅隱撰未詳其書采孔
老為內外十篇祝融者謂鬻子為諸子之首也

刊誤二卷

唐國子祭酒李涪撰

資暇集三卷

唐李匡文濟翁撰

兼明書二卷

唐國子太學博士邱光庭撰

蘇氏演義十卷

唐光啓進士武功蘇鶚德祥撰此數書者皆考究書傳訂正名物辨證訛謬有益見聞尤梁谿以家藏本刻之當塗

事始三卷

唐吳王諮議宏文館學士南陽劉存撰

案唐書藝文志劉孝孫房

德懋撰鄭樵通志云皆為王府官以教諸王始學

災輟子三卷

唐王睿撰以古今注二儀寶錄樂府解題等書刪併
為一編

伸蒙子三卷

案宋史藝文志作伸蒙子
原本作仲蒙誤今改正

唐校書郎長樂林慎思虔中撰

中華古今注三卷

後唐太學博士馬縞撰蓋推廣崔豹之書也

格言五卷

南唐中書侍郎北海韓熙載叔言撰

化書六卷

南唐宰相廬陵宋齊邱子嵩撰

物類相感志一卷

僧贊寧撰國初名釋也

耄智餘書三卷

太子少保致仕澶淵晁迥德遠撰迥善養生兼通釋
老書年至八十四子孫多聞人

昭德新編一卷

晁迥撰昭德者京師居第坊名也晁氏子孫皆以為稱

聾隅子二卷

蜀人黃晞撰聾隅其自號也本朝仁宗時人書名獻
欽瑣微論凡十篇

宋景文筆記一卷

翰林學士安陸宋祁子京撰

近事會元五卷

李上友撰自唐武德至周顯德雜事細務皆記之

徽言三卷

司馬光手鈔諸子書題其末曰余此書類舉人所鈔
書然舉人所鈔獵其辭余所鈔覈其意舉人志科名
余志道德其書迂叟年六十八蓋公在相位時也方
機務填委且將屬疾而好學不厭克勤小物如此所
鈔自國語而下六書其目三百一十有二小楷端重
無一筆不謹百世之下使人肅然起敬真蹟藏邵康

節家其諸孫遵守漢嘉從邵氏借刻攜其板歸越今
在其羣從述尊古家

泣岐書三卷

蜀人龍昌期撰稱上昭文相公有後序言求薦進之
意

天保正名論八卷

龍昌期撰其學迂僻專非周公妄人也

事物紀原二十卷

不著名氏中興書目十卷開封高承撰元豐中人凡二百七十事今此書多十卷且數百事當是後人廣之耳

孔氏雜說一卷

清江孔平仲毅甫撰

案文獻通攷作孔武仲

晁氏客語一卷

晁說之以道撰

廣川家學三十卷

中書舍人董弁令升撰述其父適之學

石林家訓一卷

葉夢得少蘊撰

石林過庭錄二十七卷

葉夢得與諸子講說者其中子模編輯之

程氏廣訓六卷

中書舍人三衢程俱致道撰

執苑雌黃二十卷

建安嚴有翼撰大抵辨正訛謬故曰雌黃其目子史
傳注詩詞時序名數聲畫器用地理動植神怪雜事
卷為二十條凡四百條硯岡居士唐稷序之有翼嘗
分教泉州二郡

緇素雜記十卷

建安黃朝英士俊撰有陳與者為之序言甲辰六試
禮部不利蓋政宣中士子也其書亦辨正名物而學
頗迂僻言詩芍藥握椒之義鄙褻不典王氏之學前

輩以資戲笑而朝英以為得詩人深意其識可見矣
聖賢眼目一卷

曲阿洪興祖慶善撰摘取經子數十條以己見發明
之

義林一卷

眉山程敦厚子山撰其上世東坡外家也子山為人
凶險與眉守邵溥有隙以匹絹為匿名書誣以罪狀
抵帥蕭振振逮溥繫獄鞠之或教溥一切誣服得不

以鍛鍊死獄上朝議以匿名不當受而制司非得旨
不應擅逮繫郡守遂兩罷之溥雖得弗問而終無以
自明憤訴於天子山之居極壯麗一夕燼於火後附
秦檜至右史後復得罪謫知安遠縣以沒

弟子職等五書一卷

漳州教授張時舉以管子弟子職篇班氏女誡呂氏
鄉約鄉禮司馬氏居家雜儀合為一編

演蕃露十四卷續六卷

程大昌泰之撰初在館中見蕃露書以為非說見春秋類又引古今注冕旒綴玉下垂如繁露然蓋與玉杯竹林同為託物名篇可想見也今日演蕃露意古之蕃露與爾雅釋名廣雅刊誤正俗之類云爾

考古編十卷續編十卷

程大昌撰上自詩書下及史傳世俗雜事有可考見者皆筆之

楚澤叢語八卷

右迪功郎李著吉先撰不知何人作其書專闢孟子
紹興中撰進大意以為王氏之學出於孟氏然王氏
信有罪矣孟氏何與焉此論殆得於晁景迂之微意
容齋隨筆續筆三筆四筆各十六卷五筆十卷

翰林學士鄱陽洪邁景盧撰每編皆有小序五筆未
成書

續顏氏家訓八卷

左朝請大夫李正公撰皆用顏氏篇目而增廣之

習學記言五十卷

寶文閣學士龍泉葉適正則撰自六經諸史子以及
文鑑皆有論說大抵務為新奇無所蹈襲其文刻削
精工而義理未得為純明正大也自孔子之外古今
百家隨其淺深咸有遺論無得免者而獨於近世所
傳子華子篤信推崇之以為真與孔子同時可與六
經並考而不悟其為偽也且既曰其書甚古而文與
今人相近則亦知之矣遠自七略下及隋唐國史諸

志李邯鄲諸家書目皆未之有豈不足以驗其非古
出於近世好事能文者之所為而反謂孟荀以來無
道之者蓋望而棄之也不亦惑乎

準齋雜說一卷

錢塘吳如愚撰

濯畦暇語一卷

不知作者雜取史傳事略述己意

忘筌書二卷

潘植子醇撰新安所刻本凡八十二篇與館閣書目
諸儒鳴道集及余家寫本篇數皆不同本已見儒家
而館目寘之雜家者以其多用釋老之說故也今亦
別錄於此

袁氏世範三卷

樂清令三衢袁采君載撰

直齋書錄解題卷十

欽定四庫全書薈要卷九千七百十七

史部

直齋書錄解題卷十一

宋 陳振孫 撰

小說家類

神異經一卷

稱東方朔撰張茂先傳

十洲記一卷

亦稱東方朔撰二書詭誕不經皆假託也漢書本傳
叙朔之辭未言劉向所錄朔書具是矣世所傳他事

皆非也贊又言朔之談諧其事浮淺行於衆庶而後
世好事者因取奇言怪語附著之朔故詳錄焉史家
欲祛妄惑可謂明矣

洞冥記四卷拾遺一卷

東漢光祿大夫郭憲子橫撰題漢武別國洞冥記其
別錄又於御覽中鈔出然則四卷亦非全書也凡若
是者藏書之家備名數而已無之不足為損有之不
足為益況於詳畧尤非所計也唐志入神仙家

拾遺記十卷

晉隴西王嘉子年撰蕭綺序錄

名山記一卷

亦稱王子年即前之第十卷

案此句原本誤脫今據文獻通攷增入

大

抵皆詭誕嘉符秦時人見晉書藝術傳

殷芸小說十卷

宋殷芸撰邯鄲書目云或題劉餗非也今此書首題

秦漢魏晉宋諸帝注云齊殷芸撰非劉餗明矣故其

序事止宋初蓋於諸史傳記中鈔集或稱商芸者宣
祖廟未祧時避諱也

世說新語三卷叙錄二卷

宋臨川王劉義慶撰梁劉峻孝標注叙錄者近世學
士新安汪藻彥章所為也首為考異繼列人物世譜
姓氏異同末記所引書目按唐志作八卷劉孝標續
十卷自餘諸家所藏卷第多不同叙錄詳之此本董
令升刻之嚴州以為晏元獻公手自校定刪去重複

者

案叙錄者以下原本脫
去今據文獻通攷補入

續齊諧記一卷

梁奉朝請吳均撰齊諧志怪本莊子語也唐志又有
東陽無疑齊諧志今不傳此書殆續之者歟

北齊還冤志二卷

顏之推撰

古今同姓名錄一卷

梁元帝撰有陸善經者續之至五代時

朝野僉載一卷

唐司門郎中饒陽張鷟文成撰其書本三十卷

案宋史藝

文志朝野僉載二十卷又僉載補遺三卷文獻通攷止載補遺三卷蓋亦未見全書此云本三十卷疑誤

此特其節畧爾別求之未獲鷟自號浮休子

補江總白猿傳一卷

無名氏歐陽紇者詢之父也詢貌類獼猿蓋嘗與長孫無忌互相嘲謔矣此傳遂因其嘲廣之以實其事託言江總必無名子所為也

冥報記二卷

唐吏部尚書京兆唐臨本德撰

劉餗小說三卷

唐右補闕劉餗鼎卿撰

隋唐嘉話一卷

劉餗撰

博異志一卷

稱谷神子不知何人所記初唐及中世事

辨疑志三卷

唐宣武行軍司馬吳郡陸長源撰辨里俗流傳之妄

宣室志十卷

唐吏部侍郎常山張讀聖用撰

案文獻通攷聖用作聖朋

宣室者

漢文帝問鬼神之處也

封氏見聞記二卷

唐吏部郎中封演撰前紀典故未及雜事頗有可觀

劉公佳話一卷

唐江陵少尹韋絢文明撰劉公禹錫也絢執誼之子
戎幕閒談一卷

韋絢撰為西川巡官記李文饒所談

聞竒錄一卷

不著名氏當是唐末人

柳常侍言旨一卷

唐柳珣撰常侍者其世父芳也凡六章末有劉幽求
及上清傳

幽閒鼓吹一卷

唐張固撰

甘澤謠一卷

唐刑部郎中袁郊撰所記凡九條咸通戊子自序以其春雨澤應故有甘澤成謠之語遂以名其書

乾腩子三卷

唐溫庭筠飛卿撰序言不爵不觥非魚非炙能悅諸心聊甘衆口庶乎乾腩之義腩與饌同字從肉見古

禮經

尚書故實一卷

唐李綽撰又名尚書談錄首言賓護尚書河東張公
三代相門謂嘉貞延賞宏靖也宏靖盧龍失御貶賓
客分司綽唐末人未必及宏靖宏靖之後文規次宗
彥遠皆不登八座未詳所謂唐志即以為延賞尤不
然

雜纂一卷

唐李商隱義山撰俚俗常談鄙事可資戲笑以類相
從今世所稱殺風景蓋出於此又有別本稍多皆後
人附益

盧氏雜記一卷

唐盧言撰

杜陽雜編三卷

唐武功蘇鶚德祥撰

酉陽雜俎二十卷續十卷

唐太常少卿臨淄段成式柯古撰所記故多譎怪其
標目亦奇詭如天咫玉格壺史貝編尸安之類成式
文昌之子

廬陵官下記二卷

段成式撰為吉州刺史時也

唐闕史三卷

唐高彥休撰自號參寥子乾符中人

北里志一卷

唐學士孫榮撰載平康狹邪事

玉泉筆端三卷又別一卷

不著名氏有序中和三年作末有跋云扶風李昭德
家藏之書也即故淮海相公孫又稱黃巢陷洛之明
年跋亦不知何人別一本號玉泉子比此本少數條
而多五十二條無序跋錄其所多者為一卷

雲溪友議十二卷

唐范攄撰自稱五雲溪人咸通時唐志三卷

傳奇六卷

唐裴鉞撰高駢從事也尹師魯初見范文正岳陽樓記曰傳奇體爾然文體隨時要之理勝為貴文正豈可與傳奇同日語哉蓋一時戲笑之談耳唐志三卷今六卷皆後人以其卷帙多而分之也

三水小牘三卷

唐皇甫牧遵美撰天祐中人三水者安定屬邑也

醉鄉日月三卷

唐皇甫松子竒撰唐人飲酒令此書詳載然今人皆不能曉也

異聞集十卷

唐屯田員外郎陳翰撰翰唐末人見唐志而第七卷所載王魁乃本朝事當是後人勦入之耳

卓異記一卷

案原本不著卷數今據宋史藝文志補入

稱李翱撰記當時君臣卓絕盛事或云長城陳翱案宋

史藝文志既載李翱卓異記又有卓異記一卷題陳翰撰注云一作翱疑一書而誤分為二也

大唐說纂四卷

不著名氏分門類事若世說止有十二門恐非全書
撫言十五卷

唐王定保撰專記進士科名事定保光化三年進士
為吳融子華婿喪亂後入湖南棄其妻弗顧士論不
齒

廣撫言十五卷

鄉貢進士何晦撰

案晦原本作臨文獻通攷宋史藝
文志俱作晦十國春秋亦云何晦

著撫言
今改正

其序言太歲癸酉下第於金陵鳳臺旅舍癸

酉者開寶六年也時江南猶未下晦蓋其國人歟

金華子新編三卷

大理司直劉崇遠撰五代時人記大中以後雜事

耳目記一卷

無名氏邯鄲書目云劉氏撰未詳其名記唐末以後
事

唐朝新纂三卷

融州副使石文德撰

豪異秘纂一卷

無名氏所錄五事其扶餘國王一則即所謂虬須客者也

紀聞譚三卷

蜀潘遠撰館閣書目按李淑作潘遺今考邯鄲書目亦作潘遠其曰遺者本誤也所記隋唐遺事

北夢瑣言三十卷

案文獻通攷作二十卷

黃州刺史臨井孫光憲孟文撰載唐末五代及諸國
雜事光憲仕荆南高從誨三世在幕府北夢者言在
夢澤之北也後隨繼沖入朝有薦於太祖者將用為
學士未及而卒光憲自號葆光子

後史補三卷

前進士高若拙撰

野人閒話五卷

成都景煥撰記孟蜀時事乾德三年序

續野人閒話二卷

不知作者

開顏集三卷

校書郎周文規撰未知何時人以古笑林多猥俗迺
於書史中鈔出可資談笑者為此編

洛陽搢紳舊聞記五卷

案文獻通
攷作十卷

丞相曹國張齊賢師亮撰所錄張全義治洛事甚詳
也

太平廣記五百卷

太平興國二年詔學士李昉扈蒙等修御覽又取野史傳記故事小說撰集明年書成名太平廣記

秘閣閒談五卷

起居舍人吳淑正儀撰淑丹陽人

廣卓異記二十卷

樂史子正撰

談苑十五卷

案文獻通攷作楊文公談苑八卷

丞相宋庠公序所錄楊文公億言論初文公里人黃
鑑從公遊纂其異聞竒說名南陽談數宋公刪其重
複分為二十一門改曰談苑

文會談叢一卷

題華陽上官融撰不知何人天聖五年序

國老閒談二卷

稱夷門君玉撰不著姓

洞微志三卷

案文獻通
攷作十卷

學士錢易希白撰

乘異記三卷

南陽張君房撰咸平癸卯序取晉之乘之義也君房
又有勝說家偶無之晁公武讀書志以勝說為張唐
英君房撰又言君房著名臣傳蜀檣杙雲笈七籤行
於世按君房祥符天禧以前人楊大年改閒忙令所
謂紫微失却張君房者即其人也常為御史屬坐鞫
獄貶秩因編修七籤得著作佐郎七籤序自言君房

蓋其名非字也唐英字次功熙豐間人丞相商英天
覺之兄作名臣傳蜀檣杌者與君房了不相涉不知
晁何以合為一人也其誤明矣

補姒記八卷

案文獻通
攷作一卷

稱京兆王績編不知何時人古有宋虞之姒記等今
不傳故補之自商周而下迄於五代史傳所有姒婦
皆載之末及神怪雜說文論等最後有治姒二方尤

可笑也

祖異志十卷

信陵聶田撰康定元年序

括異志十卷後志十卷

襄國張師正撰

郡閣雅言二卷

贊善大夫潘若沖撰

案晁公武讀書志稱潘若同撰文獻通攷云書錄解題作郡閣

雜言題贊善大夫潘欲沖撰今此本仍作郡閣雅言惟稱若沖則互異

茅亭客話十卷

江夏黃休復端本撰所記多蜀事別有成都名畫記
蓋蜀人也

嘉祐雜志三卷

修起居注陳留江休復鄰幾撰

夢溪筆談二十六卷

沈括存中撰其序言退居絕過從所與談者惟筆硯
而已

茗川子所記三事一卷

不知何人三事者勃率姑王立林果毅皆異事也未
有韓蟲兒一事是歐陽公所記偶錄附此

東齋記事十卷

翰林學士蜀郡范鎮景仁撰

紀聞一卷

集賢殿修撰李復圭審言撰淑之子也

東坡手澤三卷

蘇軾撰今俗本大全集中所謂志林者也

父子一卷

相傳為東坡作未必然也

龍川畧志六卷別志四卷

蘇轍撰龍川者循州也

玉壺清話十卷

曾文瑩撰

張芸叟雜說一卷

吏部侍郎張舜民芸叟撰

畫墁集一卷

張舜民撰

洛游子一卷

題司馬光非也所稱樂全子齊物子亦莫知何人

塵史三卷

司農少卿安陸王得臣彥輔撰嘉祐四年進士其序稱政和乙未行年八十自號鳳臺子蓋王昭素之後王銍性之之伯父也揮塵錄詳載

蘇氏談訓十卷

朝請大夫蘇象先撰述其祖魏公頌子容遺訓

續世說三卷

案文獻通攷作十二卷

孔平仲毅父撰編宋至五代事以續劉義慶之書也

孫公談圃三卷

臨江劉延世祿高郵孫升君孚所談升元祐中書舍

人坐黨籍謫汀州

澠水燕談十卷

齊國王闢之聖涂撰澠齊水名春秋傳有酒如澠闢
之治平四年進士

烏臺詩話十三卷

蜀人朋九萬錄東坡下御史獄公案附以初舉發章
疏及謫官後表章書啓詩詞等

碧雲駮一卷

題梅堯臣撰以廐馬為書名其說曰世以旋毛為醜
此以旋毛為貴雖貴矣病可去乎其不遜如此聖俞

必不爾也所記載十餘條公卿多所毀訐雖范文正亦所不免或云實魏泰所作託之聖俞王性之辨之甚詳而邵氏聞見後錄乃不然之

青箱雜記十卷

朝散郎吳處厚撰知漢陽軍箋注蔡確詩者也後亦不顯

師友閒談一卷

案文獻通攷作師友談記

李廌方叔撰

劍溪野語三卷

延平陳正敏撰自號遜翁別有遜齋閒覽十四卷未

見

冷齋夜話十卷

案文獻通考作六卷

僧惠洪撰所言多誕妄

墨客揮犀十卷續十卷

不知名氏

搜神秘覽三卷

京兆章炳文叔虎撰

石林燕語十卷

葉夢得少蘊撰宣和五年所作也

燕語攷異十卷

成都宇文紹奕撰舊聞汪玉山嘗辨駁燕語之誤而未之見也

玉澗雜書十卷

葉夢得撰攷其中所記亦當在宣和時所作玉澗者

石林山居澗水名也

巖下放言一卷

葉夢得撰休致後所作

柏臺雜著一卷

石公弼撰雜記典故等事公弼本名公輔改賜今名
為御史攻蔡京甚力竟坐深文謫死然本傳言其議
論反覆非純正者

紺珠集十二卷

案文獻通攷
作十三卷

朱勝非鈔諸家傳記小說視曾慥類說為畧

類說五十卷

太府卿溫陵曾慥端伯撰所編傳記小說古今凡二百六十餘種

春渚紀聞十卷

浦城何遜撰自號寒青老農東坡所薦為武學博士曰去非者其父也

曲洧舊聞一卷雜書一卷翫骰說一卷

直秘閣新安朱弁少章撰弁於晦庵為從父建炎丁未使金留十七年既歸而卒骭骸說者以續晁无咎詞話而晁書未見

南游記舊一卷

曾紆公袞撰

翰墨叢紀五卷

樞密睢陽滕康子濟撰

鐵圍山叢談五卷

蔡條撰謫爵林博白時所作

萍洲可談三卷

吳興朱或無或撰中書舍人服行中之子宣和元年序萍洲老圃其自號也在黃州蓋其僑寓之地事見齊安志而或作或字無惑未詳孰是

硯岡筆志一卷

唐稷撰自號硯岡居士

泊宅編十卷

方勺仁聲撰泊宅在烏程相傳張志和泊舟浮家泛宅之所勺買田卜築號泊宅翁本嚴瀨人

却掃編三卷

吏部侍郎睢陽徐度敦立撰

閒燕常談三卷

董弁令升撰取士相與談仁義於閒燕之義

唐語林八卷

長安王讜正甫撰以唐小說五十家倣世說分門三

十五又益十七為五十二門中興書目十一卷而闕
記事以下十五門又云一本八卷今本亦止八卷而
門目皆不闕

道山青話一卷

不知何人跋語稱大父國史在館閣久多識前輩著
館秘錄曝書記與此而三兵火散失近得此書於曾
仲存家末題朝奉大夫暉亦不著姓

復齋閒記四卷

承議郎歷陽龔相聖任撰待制原之孫頤正之父也

鄞川志五卷

中書舍人龍舒朱翌新仲撰寓居四明故曰鄞川

窓間紀聞一卷

稱陳子兼撰未知何人雜論詩文經傳亦間述所聞事

枕中記一卷

不著名氏崇寧中人所載多國初事

姚氏殘語一卷

剡姚寬令威撰又名西溪叢話已板行

槁簡贅筆二卷

承議郎章淵伯深撰始得此書於程文簡氏不知何人作文簡題其後以其中稱先丞相申公知其為章子厚子孫也余又以其書考之言先祖光祿元祐三年省試東坡知舉擢為第一則又知其為援之孫也後以問諸章始得其名字其人博學有文以場屋待

士薄如防寇盜用蔭入仕遂不就舉居長興故序稱
若溪草堂淵自號懲室子序言錄為五卷今此為分
上下卷

老學庵筆記十卷

陸游務觀撰生識前輩年登耄期所記見聞殊可觀
也

夷堅志甲至癸二百卷支甲至支癸一百卷三甲至三
癸一百卷四甲四乙二十卷大凡四百二十卷

翰林學士鄱陽洪邁景廬撰稗官小說昔人固有為之者矣遊戲筆端資助談柄猶賢乎已可也未有卷帙如此其多者不亦謬用其心也哉且天壤間反常反物之事惟其罕也是以謂之怪苟其多至於不勝載則不得為異矣世傳徐鉉喜言怪賓客之不能自通與失意而見斥絕者皆詭言以求合今邁亦然晚歲急於成書妄人多取廣記中舊事改竄首尾別為名字以投之至有數卷者亦不復刪潤徑以入錄雖

叙事猥釀屬辭鄙俚不恤也

睽車志五卷

知興國軍歷陽郭彖次象撰取睽上六載鬼一車之語

經鋤堂雜志八卷

倪思正甫撰

續釋常談二十卷

秘書丞龔頤正養正撰昔有釋常談一書不著名氏

家藏亦缺此書今故以續稱凡常言俗語皆注其所出

北山紀事十二卷

戶部侍郎濡須王邁少愚撰

雲麓漫鈔二十卷續鈔二卷

通判徽州趙彥衡景安撰續二卷乃中庸說及漢定安公補紀也彥衡紹熙間宰烏程有能名

做告一卷

不著名氏專叙報應

夷堅志類編三卷

四川總領陳昱日華取夷堅志中詩文藥方類為一編

山齋愚見十書一卷

稱灌圃耐得翁不知何人

程史十五卷

岳珂撰程史者猶言柱記也

原註說文程牀前几也

游宦紀聞十卷

鄱陽張士南光叔撰

鼠璞一卷

戴埴撰

周盧注博物志十卷盧氏注六卷

晉張華撰其書作奇聞異事華能辨龍鮓識劍氣其學固然也

元怪錄十卷

唐牛僧孺撰唐志十卷又言李復言續錄五卷館閣書目同今但有十一卷而無續錄

瀟湘錄十卷

唐校書郎李隱撰館閣書目云爾唐志作柳詳未知書目何據也

龍城錄一卷

稱柳宗元撰龍城謂柳州也羅浮梅花夢事出其中唐志無此書蓋依託也或云王銍性之作

樹萱錄一卷

不著名氏序稱纂尚書滎陽公所談者亦不知何人
又云普聖園丘之明年普聖者僖宗由普王踐位也
書雖見唐志今亦未必真本或云劉燾無言所為也
雲仙散錄一卷

稱唐金城馮贄撰天復元年叙馮贄者不知何人自
言取家世所蓄異書撮其異說而所引書名皆古今
所不聞且其記事造語如出一手正如世俗所行東

坡杜詩注之類然則所謂馮贄者及其所蓄書皆子虛烏有也亦可謂枉用其心者矣

葆光錄三卷

陳纂撰自號襲明子所載多吳越事當是國初人

稽神錄六卷

南唐徐鉉撰元本十卷今無卷第總作一卷當是自

他書中錄出者

啟顏錄八卷

不知作者雜記詼諧調笑事唐志有侯白啟顏錄十卷未必是此書然亦多有侯白語但訛謬極多

清異錄二卷

稱翰林學士陶穀撰凡天文地理花木飲食器物每事皆制為異名新說其為書殆似雲仙散錄而語不類國初人蓋假託也

歸田錄二卷

歐陽修撰或言公為此錄未傳而序先出裕陵索之

其中本載時事及所經歷見聞不敢以進旋為此本而初本竟不復出未知信否公自為序略曰歸田錄者朝廷之遺事史官之所不記與夫士大夫談笑之餘而可錄者錄之以備閒居之覽也又曰唐李肇國史補序云言報應叙鬼神述夢卜近怪異悉去之記事實探物理辨疑惑示勸戒采風俗助談笑則書之余之所錄大抵以肇為法而小異於肇者不書人之過惡以為職非史官而掩惡揚善君子之志也覽者

詳之

歸田後錄十卷

朝請郎廬江朱定國興仲撰熙豐間人竊取歐公舊錄之名實不相關也

清夜錄一卷

沈括撰

續清夜錄一卷

王銍性之撰

王原叔談錄一卷

翰林學士南京王洙之子錄其父所言

延漏錄一卷

不著名氏其間稱伯父卹公知其為章得象之姪也
後題此書疑章望之作然未敢必望之者字表民用
卹公廕入官歐陽公為作字說者也以宰相嫌遂不
仕錄中又記皇祐中與滕元發同試滕首冠而已被
黜藉令非望之亦當時場屋有聲者章氏雋才固多

也

清虛居士隨手雜錄一卷

王鞏定國撰待制素子張安道之婿

石渠錄十一卷

校書郎昭武黃伯思長睿撰

避暑錄話二卷

葉夢得紹興五年所作

臺省因話錄一卷

兵部尚書新昌石公弼國佐撰

思遠筆錄一卷

翰林學士九江王寓撰寓以靖康元年七月以禮部尚書入翰苑雜記當時聞見凡二十七條寓父易簡以布衣召為說書遂顯用寓後拜左轄使金辭行謫散官嶺表父子俱南下沒於盜

秀水閒居錄三卷

丞相汝南朱勝非藏一撰寓居宜春時作秀水者袁

州水名也

聞見後錄二十卷

邵某撰

侍兒小名錄一卷續一卷

序題朋谿居士而不著名氏始洪炎玉父集為此書
王銍性之溫豫彥幾續補今又因三家而增益之且
為分類其中多用古字或云董彥遠家子弟所為也
紀談錄十五卷

稱傳密居士不著名氏蓋晁公邁伯咎也

賢異錄一卷

亦無名氏所記四事其一曰鬼傳者言王翬家子弟
所遇與世傳王子高事大同小異當是一事耳

能改齋漫錄十三卷

太常寺主簿臨川吳曾虎臣撰

揮麈錄三卷後錄十一卷第三錄三卷餘話一卷

朝請大夫汝陰王明清仲言撰明清銍之子曾紆公

袞之外孫故家傳聞前言徃行多所憶後錄跋稱六卷今多五卷

投轄錄一卷

王明清撰所記奇聞異事客所樂聽不待投轄而留也

吳船錄一卷

范成大至能撰自蜀帥東歸紀游取門泊東吳萬里船之語

瑣碎錄二十卷後錄二十卷

溫革撰陳昱增廣之後錄者書坊增益也


鑑誠別錄三卷

廬陵歐陽邦基壽卿撰周益公洪景盧有序跋

樂善錄十卷

蜀人李昌齡伯崇撰以南中勸戒錄增廣之多因果
報應之事

直齋書錄解題卷十一



總校官庶吉士臣侍朝

校對官編修臣莫瞻菴

校對官庶吉士臣何思鈞

謄錄監生臣于世第

謄錄貢生臣李垌